

## cui voi dai Piçui

# Politics: ocjo des listis civuitis!

PRE VIGJI GLOVAZ

**T**ancj a crodin che la politiche e je sporcje, che i politics a son ducj companj, ducj tacâts a la poltrone, ducj preocupâts di replicâsi a ogni elezion gnove che si presenti, ducj a fâsi lis scarpis sot vie, a slengonâsi in public, a tirâ jù lis taris dai avversaris, a volê gjavâur il patûs dal voli cence permeti di tocjâ il fros che e àn tal lôr. Ducj o vin provis su provis che e je simpri stade e lade cussi, fale doi trê câs, ducj a pensin cun rassegnazion che no si cambie implant, che no si lasse la mangjatorie plene e sigure par un plat che si à di jemplâlu lavorant e strussiant tal libar marcjât che nol sigure il lavôr a la pluritât.

Po stai che si vedi cent resons par dubitâ che e continui la stesse solfe, ma lis ultimis elezions amministrativis nus àn dade la provê che il cuaiat nol va simpri pe stesse agâr. Te cjadree che si lasse vueide par cualchi zornade e par sante scugne

la vilie des elezions no si è plui sigûrs di tornâ a sintâsi. Nancje Gjin, il sindic in scjadence di une piçule Comune furlane di là dal Aghe, nol varès mai pensât un supuest tâl cuant che i à proponût a un amì, par proforme, di metisi a la capite di une seconde liste pes votazions. I à diti: «Sint Fabio, se no si fâs une seconde liste

dongje de mè e la mè no le votin? Al va a finîle che nus mandin un Comissari e vie jè la nestre autonomie!». Fabio i à rispuindût che la politi-

che no i interessave, che il timp libar lu dedicave a la Juventus e nol voleve impaçâsi cu la int, simpri pretenzionose e mai contente. «No sta preocupâti che o fâs dut jo, i à rispuindût il Gjin. Ti sielç il simbul, il mot e i candidâts di plante fûr. Ti met sù une liste civuite tant che i spaventeparis e i pareodulis tal ort di cjase».

Dit e fat! Gjin, cun dut che al è a stâ in citât, al à providût piç par piç par tornâ a doprâ la poltrone e par vé in Consei, al plui, un avversari mugnstri tant che il gjat passût. Ma i cjaçadôrs a san par esperience che novante nûf si trai al salvadi e une al cjan. E, in cualchi câs, il colp impen che par devant al salte fûr pe culate. Il sindic in scjadence al veve sintût il revoc di cualchi malcontent, ma jessint a stâ fûr di pais no i veve dât pês. Il lunis di sere tal scrutinâ e je saltade fûr la scuaiade: la liste civuite e à stramontât chê che e crodeva di trionfâ. In soreplui doi di lôr de liste vitoriose no àn nancje vude une preference. Chest fat al po vedi plui spiegazions: che i candidâts a àn vût il sintiment e il pudôr di no votâsi se; che no vedin vude la voie di là a votâ; che no vedin podût o che no si sedin sintûts di là e tornâ te domenie de France o de Gjermanie par votâ e il lunis sedi a vore.

Al pâr che chel di Cimolais al sedi un câs no dome râr, ma unic in dute Italie. In Friûl o vin di tignîsi in bon, che o sin stâts i prins a screâ une alternative pussibil e buine par dute l'Italie. Ducj i politics e i partûts, fale siet vot, a no san plui ce recipe inventâ par che lis lôr cjadreis a pene lassadis cjaldis a restin a disposizion dal lôr florean. Cuissà che no ur vegni tal cjâf il strabalç di chel Prin Citadin in scjadence e no metin sul marcjât eletoral une liste civuite juste l'an cu ven!

Par cjatâ un trop di malapaiâts che al fâsi un pœc di scjas sot vie si lu cumbine di sigûr e cence tante fadie.

